

Panalangin ng mga Kristiyano sa Maghapon
LITURGY OF THE HOURS

PANALANGIN SA UMAGA

Ika-3 ng Abril, 2026

{ Biyernes Santo }



Paanyaya sa Panalangin

Tumayo at gawin ang tanda ng krus sa mga labi

Panginoon, buksan mo ang aking mga labi.

— At pupurihin ka ng aking bibig.

Salmo 95

Ang Panawagan upang papurihan ang Diyos

Halina't sambahin si Kristong Anak ng Diyos na sa ati'y tumubos sa pamamagitan ng kanyang dugo.

— Halina't sambahin si Kristong Anak ng Diyos na sa ati'y tumubos sa pamamagitan ng kanyang dugo.

Tayo ay lumapit sa 'ting Panginoon, Siya aawitan,
Ating paputihan ang batong kublihan nati't kalakasan.
Tayo ay lumapit sa kanyang harapan na may pasalamat,
Siya ay Purihin ng mga awiting may tuwa at galak.

— Halina't sambahin si Kristong Anak ng Diyos na sa ati'y tumubos sa pamamagitan ng kanyang dugo.

Sapagkat ang Diyos ay ang Panginoong napakadakila,
Ang dakilang Haring higit sa sinuman na binabathala.
Nasa kanyang palad ang buong daigdig pati kalaliman,
Ang lahat ay kanya maging ang mataas nating kabundukan.
Kanya rin ang dagat at pati ang lupa na kanyang nilalang.

— Halina't sambahin si Kristong Anak ng Diyos na sa ati'y tumubos sa pamamagitan ng kanyang dugo.

Tayo ay lumapit, sa kanya'y sumamba at magbigay-galang,
Lumuhod sa harap nitong Panginoong sa ati'y lumalang.
Siya ang ating Diyos, tayo ay kalinga niyang mga hirang,
Mga tupa tayong inaalagaan.

— Halina't sambahin si Kristong Anak ng Diyos na sa ati'y tumubos sa pamamagitan ng kanyang dugo.

Ang kanyang salita ay ating pakinggan:
“Iyang inyong puso'y huwag patigasín,
Tulad ng ginawa ng inyong mga magulang

Nang nasa Meriba, sa ilang ng Masa.

Ako ay tinukso't doon ay sinubok ng inyong magulang,
Bagamat nakita ang aking ginawang sila'ng nakinabang.

- Halina't sambahin si Kristong Anak ng Diyos na sa ati'y tumubos sa pamamagitan ng kanyang dugo.

Apatnapung taon, sa inyong ninuno ako ay nagdamdam,
Ang aking sinabi, "Sila ay suwail, walang pakundangan
At ang mga utos ko ay sinusuway!"

Dahil sa galit ko, ako ay sumumpang di sila daratal,
Sa lupang pangakong aking inilaan."

- Halina't sambahin si Kristong Anak ng Diyos na sa ati'y tumubos sa pamamagitan ng kanyang dugo.

Papuri sa Ama, at sa Anak, at sa Espiritu Santo;
Kapara noong una, ngayon at magpasawalang hanggan. Amen.

- Halina't sambahin si Kristong Anak ng Diyos na sa ati'y tumubos sa pamamagitan ng kanyang dugo.

Panalangin sa Umaga

AWIT

Ang PANGINOONG Hesus sa hardin ay nanalangin;
Naiyak sa lungkot ngunit kinalinga ng anghel.
O PANGINOONG Hesus, itinatwa ka ni Judas
At iniwan kang nag-iisa ng mga alagad.

O PANGINOONG Hesus, hinamak ka at niluran
Pinagpapalo pa't hinatulan ng kamatayan.
O PANGINOONG Hesus, ang krus ay iyong pinasan
Hanggang sa Kalbaryo para sa aming kasalanan.

O PANGINOONG Hesus, ikaw man ay hinubaran,
Ipinakong walang awa ngunit ni walang angal.
O PANGINOONG Hesus, patawad pa ang tinuran
Dahil ang ninais mo ay ang aming kaligtasan.

MGA ANTIPONA AT SALMO

Antipona 1

Hindi ipinagkait ng Diyos ang kanyang sariling Anak na minamahal, kundi ibinigay siya upang magpakasakit para sa ating kapakanan.

Salmo 51

(O Diyos, maawa ka sa akin)

Ako'y kaawaan, O mahal kong Diyos,
Sang-ayon sa iyong kagandahang-loob;
Mga kasalanan ko'y iyong pawiin,
Ayon din sa iyong pag-ibig sa akin!
Linisin mo sana ang aking karumhan
At ipatawad mo yaring kasalanan!

Ang pagsalansang ko ay kinikilala,
Laging nasa isip ko at alaala.
Sa iyo lang ako nagkasalang tunay,
At ang nagawa ko'y di mo nagustuhan;

Kaya may matuwid ka na ako'y hatulan,
Marapat na ako'y iyong parusahan.
Ako'y masama na buhat nang iluwal,
Makasalanan na nang ako'y isilang.

Nais mo sa aki'y isang pusong tapat;
Puspusin mo ako ng dunong mong wagas.
Ako ay linisin, sala ko'y hugasan
At ako'y puputi nang walang kaptantay.

Sa galak at tuwa ako ay puspusin;
At muling babalik ang galak sa akin.
Ang kasalanan ko'y iyo nang limutin,
Lahat kong nagawang masama'y pawiin.

Isang pusong tapat sa aki'y likhain,
Bigyan mo, O Diyos, ng bagong damdamin.
Sa iyong harapa'y h'wag akong alisin;

Ang Espiritu mo ang papaghariin.

Ang galak na dulot ng 'yong pagliligtas,
Ibalik at ako ay gawin mong tapat.
Kung magkagayon na, aking tuturuang
Sa iyo lumapit ang makasalanan.

Ingatan mo ako, Diyos kong Manunubos,
Ang pagliligtas mo'y galak kong ibabantog.
Turuan mo akong makapagsalita,
At pupurihin ka sa gitna ng madla.

Hindi mo na nais ang mga panghandog;
Sa haing sinunog di ka nalulugod.
Ang handog ko, O Diyos, na karapat-dapat
Ay ang pakumbaba't pusong mapagtapat.

Iyong kahabagan, O Diyos, ang Sion;
Yaong Jerusalem ay muling ibangon.
At kung magkagayon, ang handog na haing
Dala sa dambana, torong susunugin,
Malugod na ito'y iyong tatanggapin.

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Hindi ipinagkait ng Diyos ang kanyang sariling Anak na
minamahal, kundi ibinigay siya upang magpakasakit para sa ating
kapakanan.

Antipona 2

Minahal tayo ni Hesus at ibinuhos ang kanyang dugo para sa atin
upang hugasan ang ating mga kasalanan.

Awit: Habakkuk 3:2-4, 13a, 15-19

(Dumarating ang Diyos upang magbukom)

PANGINOON, narinig ko ang lahat ng ulat tungkol sa iyo,
At ako'y nalipos ng paghanga sa iyong mga ginawa.
Ulitin mo ang mga gawang ito sa panahong ito
At magpakahayag kang muli ngayon.

Ipadama mo ang iyong awa kahit sa panahon ng pagkapoot.

Ang Diyos ay nanggaling sa Teman,
At ang Banal ay nagmula sa Bundok ng Paran.
Laganap sa kalangitan ang kanyang kadakilaan,
At nagsisikip sa sanlibutan ang pagpuri sa kanya.

Darating siyang singliwanag ng kidlat,
Gumuguhit mula sa kanyang kamay;
At doon natatago ang kanyang kapangyarihan.
Lumabas ka para iligtas ang iyong bayan,
At ang haring pinahiran mo ng langis.

Dumaan kang nakasakay sa iyong mga kabayo sa gitna ng
karagatan,
Anupat tumaas ang malalakas na alon.
Narinig ko ito at ang aking buong katawan
ay nanginig, nangatal ang labi ko.

Nanghina ang aking mga buto,
At naging mabuway ang aking paghakbang.
Mapayapa kong hihintayin ang takdang panahon
Ang pagpaparusa ng Diyos sa umapi sa amin.

Bagama't di namumunga ang punong igos
At hindi rin namumunga ang puno ng ubas,
Kung ang pamumunga ng olibo'y mabalam
At walang anihin sa mga bukirin.

Kahit mamatay ang mga tupa sa kulungan
At daanan ng salot ang bakahan sa mga silungan.
Mananalig pa rin ako sa PANGINOON;
Ako'y magagalak dahil sa Diyos ng aking kaligtasan.

Ang Diyos na PANGINOON ay aking lakas;
Tumatakbo akong simbilis ng usa,
At iniingatang ligtas kahit sa kabundukan.

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Minahal tayo ni Hesus at ibinuhos ang kanyang dugo para sa atin upang hugasan ang ating mga kasalanan.

Antipona 3

Sinasamba namin ang iyong krus, O Panginoon; pinupuri namin at dinarakila ang iyong banal na pagkabuhay, dahil ang kahoy ng krus ang nagdulot ng kagalakan sa sanlibutan.

Salmo 147:12-20

(Ang pagpapanumbalik ng Jerusalem)

Purihin mo, Jerusalem, purihin ang PANGINOON,
Purihin mo ang iyong Diyos, kayong mga taga-Sion.

Yaong mga pintuan mo ay siya ang nag-iingat,
Ang lahat ng iyong lingkod ay siya ang nagbabasbas.
Ginagawang matahimik yaong mga hangganan mo,
Bibigyan kang kasiyahan sa kaloob niyang trigo.

Kung siya ay nag-uutos, agad itong natutupad,
Dumarating sa daigdig, na hindi na nagluluwat.
Singkapal ng damit-tupa yaong yelong pumapatak,
Para itong alikabok na sa lupa'y lumalagpak.

Mga yelong buo-buo, sinlaki ng munting bato,
Lumalagpak, na ang lamig di matiis kahit sino.
Ang yelo ay natutunaw, sa isa lang niyang utos,
Umiihip yaong hangi't ang tubig ay umaagos.

Kay Jacob n'ya ibinigay ang balita at pabilin,
Ang tuntuni't mga aral, ibinigay sa Israel.
Ang ganitong karapatan ay wala ang ibang bansa,
Pagkat hindi nila batid ang utos na itinakda.

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Sinasamba namin ang iyong krus, O Panginoon; pinupuri namin at dinarakila ang iyong banal na pagkabuhay, dahil ang kahoy ng krus ang nagdulot ng kagalakan sa sanlibutan.

PAGBASA NG SALITA NG DIYOS

Isaias 52:13-15

Ang lingkod ko'y magtatagumpay sa kanyang gawain. Mababantog siya at dadakilain. Marami ang nagitla nang siya'y makita dahil sa pagkabugbog sa kanya'y halos di makilala kung siya'y tao. Ngayo'y marami rin ang mga bansang magugulantang. Pati mga hari pag siya'y nakita ay matitigilan. Makikita nila ang di nabalita kahit na kailan, at mauunawa ang di pa narinig ninuman.

Antipona

Para sa ating kapakanan, si Kristo ay naging masunurin hanggang kamatayan, hanggang kamatayan sa krus.

Tumayo

PAPURING AWIT NI ZACARIAS

Antipona

Sa kanyang ulunan ay inilagay ang paratang sa kanya: Hesus na taga-Nazaret, Hari ng mga Hudyo.

Lukas 1:68-79

Gumawa tanda ng krus

Purihin ang Panginoong Diyos ng Israel!
Sapagka't nilingap niya at pinalaya ang kanyang bayan.

At nagpadala siya sa atin ng isang makapangyarihang
Tagapagligtas,
Mula sa lipi ni David na kanyang lingkod.

Ipinangako niya sa pamamagitan ng kanyang banal na propeta
noong una,

Na ililigtas niya tayo sa ating mga kaaway,
At sa kamay ng lahat ng napopoot sa atin.

Ipinangako rin niya na kahahabagan ang ating mga magulang,
At aalalahanin ang kanyang banal na tipan.

Iyan ang sumpang binitiwang niya sa ating amang si Abraham,
Na ililigtas tayo sa ating mga kaaway,

Upang walang takot na makasamba sa kanya,
At maging banal at matuwid sa kanyang paningin, habang tayo'y nabubuhay.

Ikaw naman, anak, ay tatawaging propeta ng Kataas-taasan;
Sapagka't mauuna ka sa Panginoon upang ihanda ang kanyang mga daraanan,
At ituro sa kanyang bayanang landas ng kaligtasan,
Ang kapatawaran ng kanilang mga kasalanan.

Sapagka't lubhang mahabagin ang ating Diyos;
Magbubukang-liwayway sa atin ang araw ng kaligtasan.
Upang magbigay-liwanag sa mga nasa kadiliman at nasa ilalim ng kamatayan,
At patnubayan tayo tungo sa daan ng kapayapaan.

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Sa kanyang ulunan ay inilagay ang paratang sa kanya: Hesus na taga-Nazaret, Hari ng mga Hudyo.

PANGKALAHATANG PANALANGIN

Para sa ating kapakanan, ang ating Manunubos ay nagdanas ng kamatayan, nalibing, at muling nabuhay. Buong puso't pagmamahal na atin siyang sambahin at ating idalangin:

— Panginoon, kaawaan mo kami.

Kristong aming Guro, para sa aming kapakanan, ikaw ay naging masunurin hanggang kamatayan,
turuan mo kaming sundin ang kalooban ng Ama sa lahat ng bagay.

— Panginoon, kaawaan mo kami.

Kristong aming buhay, sa pamamagitan ng iyong kamatayan sa krus, winasak mo ang kapangyarihan ng kasamaan at kamatayan, kami nawa'y mamatay kasama mo at muling mabuhay kasama mo sa kaluwalhatian.

— Panginoon, kaawaan mo kami.

Kristong aming Hari, ikaw'y naging hamak sa gitna namin, tila isang hayop at di tao,
turuan kami ng kababaang-loob na siyang pamamaraang iyong ginamit sa pagsagip sa mundo.

— Panginoon, kaawaan mo kami.

Kristong aming kaligtasan, ibinigay mo ang iyong sarili hanggang kamatayan dahil sa pag-ibig mo sa amin,
tulongan mo kaming ipadama sa isa't isa ang iyong pag-ibig na di-nagmamaliw.

— Panginoon, kaawaan mo kami.

Kristong aming Tagapagligtas, sa krus ay niyakap mo ang lahat ng panahon sa pamamagitan ng mga bisig mong nakaunat,
pag-isahin mo ang mga nagkahiwa-hiwalay na anak ng Diyos sa kaharian ng iyong pagligligtas.

— Panginoon, kaawaan mo kami.

Ama Namin

Ama namin, sumasalangit Ka
Sambahin ang ngalan Mo
Mapasaamin ang kaharian Mo
Sundin ang loob Mo
Dito sa lupa, para nang sa langit.
Bigyan Mo kami ngayon ng aming kakanin sa araw araw.
At patawarin Mo kami sa aming mga sala,
Para nang pagpapatawad namin
Sa mga nagkakasala sa amin.
At huwag Mo kaming ipahintulot sa tukso,
At iadya Mo kami sa lahat ng masama.
Sapagkat Iyo ang kaharian, at kapangyarihan,
At ang kadakilaan, magpakailanman.

PANGWAKAS NA PANALANGIN

Amang makapangyarihan,
tunghayan nang buong pag-ibig
ang sambayanan mo
gaya ng pag-ibig na ipinamalas

sa amin ni Hesukristonang ipaubaya
niya ang sarili sa mga masasamang tao
at nagpakasakit sa krus ng Kalbaryo.
Hinihiling namin ito sa pamamagitan ni Hesukristo
kasama ng Espiritu Santo magpasawalang hanggan.

— Amen.

Paghayo

Pagpalain nawa tayo ng panginoon, iligtas tayo mula sa lahat ng
kasamaan at akayin tayo sa buhay na walang hanggan.

— Amen.

PANALANGIN NG MGA KRISTIYANO SA MAGHAPON

Ang mga tekstong biblikal at mga Papuring Awit na ginamit ay halaw mula sa MAGANDANG BALITA BIBLIA. Karapatang-sipi @ 1973, Philippine Bible Society, U.N. Ave., Manila.

Ang mga titik ng mga Awit at ang mga disenyong pansining ay likha ni Padre Mar DJ Arenas.

Karapatang-sipi @ 1994, LUPON REHIYONAL UKOL SA TAGALOG SA LITURHIYA.

Archdiocesan Liturgical Commission, Manila



mobile prayers



UNITED STATES OF AMERICA
www.ebreviary.com